



O'ZBEKISTON RESPUBLIKASI MADANIYAT VAZIRINING BUYRUG'I

Toshkent sh.

№ 89

2022-y. "15" 03

"San'atim senga, obod yurtim!" ijodiy ko'rik-tanloviga tayyorgarlik ko'rish va uni yuqori saviyada o'tkazish to'g'risida

O'zbekiston Respublikasi Prezidentining 2022-yil 2-fevraldagi "Madaniyat va san'at sohasini rivojlantirishga doir qo'shimcha chora-tadbirlar to'g'risida" PQ-112-son qarori 2-ilovasi 1-bandi ijrosini ta'minlash maqsadida

BUYURAMAN:

1. O'zbekiston Respublikasi Prezidentining 2022-yil 2-fevraldagi "Madaniyat va san'at sohasini rivojlantirishga doir qo'shimcha chora-tadbirlar to'g'risida" PQ-112-son qarori 2-ilovasi 1-bandi ma'lumot va ijro uchun qabul qilinsin.

2. Mazkur qaror bilan "San'atim senga, obod yurtim!" ijodiy ko'rik-tanlovi (keyingi o'rinlarda Ko'rik-tanlov deb ataladi)ni tashkil etish va o'tkazish belgilanganligi inobatga olinsin.

3. Quyidagilar:

Ko'rik-tanlovni tashkil etish va o'tkazish bo'yicha tashkiliy-ijodiy guruh (keyingi o'rinlarda Tashkiliy-ijodiy guruh deb ataladi) tarkibi 1-ilovaga muvofiq;

"San'atim senga, obod yurtim!" ijodiy ko'rik-tanlovini tashkil etish va o'tkazish tartibi to'g'risida nizomi 2-ilovaga muvofiq;

"San'atim senga, obod yurtim!" ijodiy ko'rik-tanlovi hakamlar hay'ati tarkibi 3-ilovaga muvofiq;

"San'atim senga, obod yurtim!" ijodiy ko'rik-tanlovini o'tkazish bo'yicha smeta-xarajatlari 4-ilovaga muvofiq tasdiqlansin.

4. Ko'rik-tanlovning tuman, shahar bosqichlari joriy yilning 4-9-aprel kunlari joylardagi bolalar musiqa va san'at maktablari zallarida, viloyat bosqichlari 18-23-aprel kunlari joylardagi madaniyat markazlarida, respublika bosqichi 16-19-may kunlari Toshkent shahridagi 1, 18, 22-son bolalar musiqa va san'at maktablari zallarida o'tkazilishi ta'minlansin.

5. Belgilansinki, Ko'rik-tanlovning respublika bosqichi g'oliblarini tantanali taqdirlash marosimi joriy yilning 20-may kuni Toshkent shahridagi "Turkiston" san'at saroyida o'tkazilsin.

6. Qoraqalpog‘iston Respublikasi Madaniyat vaziri, viloyatlar madaniyat boshqarmalari hamda Toshkent shahar madaniyat bosh boshqarmasi boshliqlari:

Ko‘rik-tanlov o‘tkazilishi bo‘yicha ijtimoiy tarmoqlarda e‘lonlar berib borilishi hamda targ‘ibot ishlari amalga oshirilishini;

Ko‘rik-tanlovning tuman (shahar) bosqichlarini joylardagi bolalar musiqa va san‘at maktablarida, hududiy bosqichlarini tuman markaziy madaniyat markazlari yoki madaniyat saroylarida o‘tkazilishini;

Ko‘rik-tanlovning tuman (shahar) hududiy bosqichlarida ishtirokchilar chiqishlarini baholash uchun nizom asosida sohaning taniqli mutaxassislaridan iborat 3 (uch) nafardan kam bo‘lmagan hakamlar hay‘ati tarkibi shakllantirilishini;

Ko‘rik-tanlov o‘tkaziladigan joylarda tadbirlar nizom talablari asosida tashkil etilishi va sifatli ovoz kuchaytirish moslamalari bilan ta‘minlash choralari ko‘rilishini;

Ko‘rik-tanlovning hududiy bosqichlari g‘oliblari to‘g‘risidagi ma‘lumotlar tadbirlar yakunidan so‘ng **uch kun muddatda** Tashkiliy-ijodiy guruhga taqdim etilishini ta‘minlasin.

7. Tashkiliy-ijodiy guruh (O.Mirzayev):

Ko‘rik-tanlovni yuqori saviyada o‘tkazish uchun barcha shart-sharoitlarni yaratish;

Ishtirokchilarni aeroport va temir yo‘l vokzallarida tantanali kutib olish va yotoqxonalarga joylashtirish;

Ko‘rik-tanlov bo‘lib o‘tadigan muassasalar hamda yotoqxonalarga tez tibbiy yordam va ichki ishlar xodimlarini jalb qilish;

Ko‘rik-tanlovning respublika bosqichi g‘olibi va sovrindorlari uchun sovg‘alar, diplomlar tayyorlash;

Ko‘rik-tanlov g‘oliblarini tantanali taqdirlash va gala-konsert marosimini yuqori saviyada o‘tkazish choralarini ko‘rsin.

8. Ijodkor yoshlar bilan ishlash boshqarmasi (F.Badalov), Ta‘lim muassasalari va sohani metodologik ta‘minlash boshqarmasi (K.Mizamov), Konsert-tomosha faoliyatini rivojlantirish boshqarmasi (F.Batirov), Teatr va sirk san‘atini rivojlantirish boshqarmasi (O.Yuldashev) Ko‘rik-tanlov g‘oliblarini tantanali taqdirlash, gala-konsert marosimiga etakchi suxandonlar jalb etish, shuningdek, tantanali taqdirlash marosimini o‘tkazish ssenariysi va dasturi ishlab chiqilishini ta‘minlasin.

9. Ishlar boshqarmasi (F.Musurmonqulov) Ko‘rik-tanlov g‘oliblari uchun sovg‘alar hamda diplomlar xarid qilish va taqdirlash marosimiga yetkazib berish choralarini ko‘rsin.

10. Iqtisodiy tahlil va moliya boshqarmasi (O.Yunusov) Ko‘rik-tanlovning respublika bosqichini o‘tkazish bo‘yicha sarf-xarajatlar vazirlikning 7089–bo‘lim, 300–kichik bo‘limidagi 2022–yilda madaniy tadbirlar uchun belgilangan markazlashgan mablag‘lar hisobidan qoplanishini nazarda tutsin.

11. Buxgalteriya (F.Irgashev) mazkur buyruqning 4–ilovasida ko‘rsatilgan mablag‘lar qonunchilikda belgilangan tartibda to‘lab berilishini ta‘minlasin.

12. Axborot va matbuot xizmati (O.Fayziyev) Ko'rik-tanlov haqidagi ma'lumotlar vazirlikning rasmiy veb-sayti, ijtimoiy tarmoqlardagi sahifalari va boshqa ommaviy axborot vositalari orqali keng yoritib borilishini ta'minlasin.

13. Belgilab qo'yilsinki, Ko'rik-tanlovni tashkil etishga tayyorgarlik ko'rish va o'tkazish bo'yicha hududlarga yuboriladigan xodimlarning xizmat safari bilan bog'liq sarf-xarajatlari asosiy ish joyidan qoplanadi.

14. Mazkur buyruq ijrosini nazorat qilish vazir o'rinbosari O.Mirzayev zimmasiga yuklansin.

Vazir



O.Nazarbekov

**"San'atim senga, obod yurtim!" ijodiy ko'rik-tanlovini
tashkil etish va o'tkazish tartibi to'g'risida**

NIZOM

Mazkur Nizom O'zbekiston Respublikasi Prezidentining 2022-yil 2-fevraldagi "Madaniyat va san'at sohasini rivojlantirishga doir qo'shimcha chora-tadbirlar to'g'risida" PQ-112-son qarori 2-ilovasi, 1-bandiga muvofiq "San'atim senga, obod yurtim!" ijodiy ko'rik-tanlovini (bundan buyon matnda ko'rik-tanlov deb yuritiladi) tashkil etish va o'tkazish tartibini belgilaydi.

1-bob. Umumiy qoidalar

1. Ko'rik-tanlov respublikamizdagi umumiy o'rta ta'lim maktablari (bundan buyon matnda - Maktablar deb yuritiladi) o'quvchilari ishtirokida o'tkaziladi.
2. Ko'rik-tanlovda 10-17 yoshdagi bolalar ishtirok etadi.
3. Ko'rik-tanlovni tashkil etish va o'tkazish bilan bog'liq bo'lgan barcha chora-tadbirlar va tashkiliy ishlar Ko'rik-tanlovni tashkil etish va o'tkazish bo'yicha tashkiliy-ijodiy guruh (bundan buyon matnda — Tashkiliy-ijodiy guruh deb yuritiladi) tomonidan muvofiqlashtiriladi.
4. Nomzodlar jami to'rtta nominatsiya — an'anaviy xonandalik, baxshi, estrada xonandaligi, raqs san'ati yo'nalishlari bo'yicha saralanadi.
5. Har bir o'ringa munosib nomzodlarni tanlash uchun Qoraqalpog'iston Respublikasi, viloyatlar va Toshkent shahrida tanlovning hududiy bosqichlari o'tkaziladi. Ko'rik-tanlovda ishtirok etadigan ijrochilarning ijro mahorati tomoshabinlar hamda keng jamoatchilik ishtirokida o'ziga xos sinovdan o'tkaziladi.
6. Nomzodlar iste'dodi va ijro madaniyatining o'ziga xosligi, badiiy ijrochilik mahorati va saviyasi, milliy san'atimizning yuksak namunalaridan boxabarligi bilan alohida ajralib turishi, xalqimiz ma'naviyatini yuksaltirish, mustaqillik g'oyalarini, jamiyatimizda amalga oshirilayotgan madaniy-ma'rifiy islohotlar mohiyatini san'at vositasida targ'ib etishga xizmat qilishi lozim.
7. Tavsiya etilayotgan ishlarni ko'rishda nomzodning tayyorgarligi, badiiy ijrochilik mahorati, repertuar saviyasi (musiqqa, matn), ijtimoiy faolligi, insoniy fazilatlarini yetakchi mutaxassislar tomonidan yuqori baholanganligi, jamoatchilik tomonidan e'tirof etilganligi inobatga olinadi.

2-bob. Ko'rik-tanlovning maqsad va vazifalari

- ko'rik-tanlovning asosiy maqsad va vazifalari quyidagilar hisoblanadi:
- o'quvchi yoshlarning iste'dodi va ijodiy qobiliyatini namoyon etish;

- o'quvchilarda o'zlari tanlagan ixtisosliklarni chuqur o'rganishga qiziqishni oshirish;

- jahon mumtoz kompozitorlarining asarlari, o'zbek va boshqa xalqlar bastakorlari kuylaridan bahramand bo'lishlari uchun qulay shart-sharoitlar yaratish;

- o'zbek musiqa madaniyatini yuksak darajaga ko'tarish hamda milliy san'atimizni dunyo sahnalariga olib chiqish va kelajakda iqtidorli yoshlar ijodini targ'ib etishni ko'zlab, o'quvchilarda dastlabki ijrochilik ko'nikmalarini shakllantirish.

3-bob. Ko'rik-tanlovda ishtirok etish

Ko'rik-tanlovda ishtirok etish istagini bildirgan o'quvchilar quyidagi hujjatlarni Qoraqalpog'iston Respublikasi Madaniyat vazirligi, viloyatlar madaniyat boshqarmalari hamda Toshkent shahar madaniyat bosh boshqarmasiga 2022-yilning 1-apreliga qadar taqdim etadi:

- nomzodning tug'ilganlik haqidagi guvohnomasining nusxasi;

- nomzodning asosiy ta'lim oladigan ta'lim muassasasi rahbari tomonidan tasdiqlangan ma'lumotnoma;

- nomzodga ta'lim muassasasi rahbariyati tomonidan berilgan ijodiy tavsifnoma;

- 4 dona (9 x 12 sm hajmda) rangli fotosurat;

- nomzodning ko'rik-tanlovda ishtirok etish istagi bildirilgan talabnoma.

1. Muddatdan kechikib topshirilgan hujjatlar qabul qilinmaydi.

2. Respublika bosqichida joylardagi hakamlar hay'ati qaroriga asosan tavsiya etilgan iqtidorli o'quvchilar (har bir nominatsiya bo'yicha 1 yoki 2 nafardan nomzod) ishtirok etadilar.

4-bob. Ko'rik-tanlov ishtirokchilarini baholash

1. Ko'rik-tanlov ishtirokchilarini baholash uchun barcha yo'nalishlar bo'yicha 3 nafardan iborat tarkibda hakamlar hay'ati tuziladi.

2. Ishtirokchilar tomonidan ijro dasturlari bevosita yoddan ijro etiladi.

3. Ko'rik-tanlovning kichik va katta guruh ishtirokchilarining ijrolari hakamlar hay'atining har bir a'zosi tomonidan alohida tarzda 25 ballik tizimda baholanadi. Umumiy balli eng ko'p bo'lgan ishtirokchilar orasidan hakamlar hay'atining qaroriga asosan ko'rik-tanlovning 1, 2 va 3-o'rin sovrindorlari belgilanadi.

4. Hakamlar hay'ati qaroriga asosan ko'rik-tanlovning 1, 2 va 3-o'rin sovrindorlari belgilanadi.

5. Ko'rik-tanlov yakunlari hakamlar hay'atining qarori bilan rasmiylashtiriladi.

6. Hakamlar hay'ati a'zolarining qarori qayta ko'rib chiqilmaydi.

5-bob. Ko'rik-tanlovni moliyalashtirish va ishtirokchilarni rag'batlantirish

1. Tanlovni o'tkazish bilan bog'liq quyidagi sarf-xarajatlar O'zbekiston Respublikasi Madaniyat vazirligi tomonidan moliyalashtiriladi:

- g'oliblar uchun maxsus sovg'alar;
- diplom va statuetkalar;
- Ko'rik-tanlovning respublika bosqichi va taqdirlash marosimi uchun led ekran;

- Ko'rik-tanlovning respublika bosqichi uchun banneri;

- sahnaga qo'yiladigan gullar;

- g'oliblar uchun guldastalar;

- kanselyariya mollari;

2. Tanlovni moliyalashtirish uchun jismoniy va yuridik shaxslarning homiylik xayriyalari ham jalb etilishi mumkin.

3. Ko'rik-tanlov sovrindorlari hamda ularning o'qituvchilari va jo'navozlari O'zbekiston Respublikasi Madaniyat vazirligi, O'zbekiston Respublikasi Yoshlar ishlari agentligi hamda O'zbekiston Respublikasi Xalq ta'limi vazirligi tomonidan diplomlar va faxriy yorliqlar bilan taqdirlanadi.

6-bob. Yakuniy qoidalar

1. Ko'rik-tanlovni o'tkazish jarayonlari bo'yicha kelib chiqadigan nizolar qonun hujjatlarida belgilangan tartibda hal etiladi.